

15 MAR 1997

DR MAHATHIR SAKSI MAJLIS TANDATANGANI ENAM MoU

PADANG BESAR, 15 Mac (Bernama) -- Perdana Menteri, Datuk Seri Dr Mahathir Mohamad mengakhiri lawatan seharinya ke Perlis dengan menyaksikan majlis menandatangani enam perjanjian persefahaman (MoU) secara serentak di Kompleks Lembaga Kemajuan Ikan Malaysia (LKIM) di sini petang ini.

Perjanjian persefahaman itu ialah antara Energomal (M) Sdn Bhd dengan Perbadanan Kemajuan Ekonomi Negeri Perlis (PKENPs) untuk projek usaha sama pengeluaran alat ubah; Perlis Essential Oils Sdn Bhd dengan Marditech Corporation Sdn Bhd untuk pengeluaran minyak pati.

Perdana Management And Consultancy Sdn Bhd dengan PKENPS untuk projek pengeluaran gelatin halal; Wastewater Engineering Sdn Bhd dengan PKENPs untuk projek rawatan air, G-Two Holdings Sdn Bhd dengan PKENPs dalam bidang perhotelan serta Proven Venture Sdn Bhd, PV And MTDC dengan kerajaan negeri untuk projek pembangunan pekan Padang Besar.

Dalam ucapan ringkasnya pada majlis perjumpaan dengan pegawai kerajaan, Dr Mahathir menyatakan puas hatinya dengan tahap pembangunan yang dicapai oleh Perlis.

Beliau percaya keindahan alam semulajadi yang terdapat di negeri ini mampu menarik pelancong sekiranya dimajukan dengan terancang.

Katanya, Perlis yang suatu masa dahulu sebuah negeri yang terpisah kini dapat membangun dengan negeri-negeri lain terutamanya Kedah.

Sebelum itu Dr Mahathir meninjau tembok keselamatan yang telah siap dibina di sepanjang jalan sempadan Malaysia-Thailand dari Felda Mata Air hingga ke Padang Besar.

Perdana Menteri dan isteri berlepas pulang ke Kuala Lumpur petang ini.

-- BERNAMA

IQ OBA